


石室私抄

終五



漢書門			
類	號	函	架
一	四	七	二
〇	四	六	二
冊	冊	冊	冊

內閣文庫			
漢	書	類	號
一	四	七	二
〇	四	六	二
冊	冊	冊	冊

內閣文庫			
番號	漢	10448	
冊數	5 ( 5 )		
函號	317	76	



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





石室私抄卷之五目錄

淺草文庫

頌

瑞穀頌 并序

大中丞塗任齋公平冠頌 并序

論

命論

序

辛酉廣東同年序齒錄序

奉賀大宗伯座主澣翁董老先生七十六壽序

送邑侯董貞復父母入覲序



石室私抄 卷之五



寶鏡篇贈復初壺上人

享帚集序

桂林雜紀序

書

在松潘寄福建巡撫譚二革書

寄趙寧宇中丞書

上座王大宗伯董澍翁書四通

寄禮部董青芝書

寄大司徒劉三川公書

寄殷克齋中丞書三通

與吳仰峯兵憲書

與王白厓憲副書二通

寄冢宰楊虞坡公書

寄僉憲石董溪書

寄夔守陳獅岡書

與周將軍書

啓

賀督撫少司馬殷石汀公六十誕辰啓

賀劉撫院三川公平白蓮教啓

梅關寄謝李及泉戎院啓



梅關寄謝粵西藩臬諸公啓

文

雷祠祈雨文

謝雨文

祭徐尚寶文

同鄉合祭巡撫塗任齋文

祭楊虞坡冢宰文

祭都督李西垣文

祭陳津南大叅文

祭陳海洲大叅文

誌銘

南京戶部員外郎渠清魏公墓誌銘

明通奉大夫廣西左布政使心泉林公偕配封

孺人龔氏墓誌銘

行狀

封太宜人洪母黃氏行狀

先姚胡太淑人行狀

卷之五目錄終



石室私抄卷之五

閩中魏文煥德章甫著  
孫賢訓  
較訂重刊

瑞穀頌  
并序

皇帝御極三十載歲在丙辰序屬孟秋

西苑產一莖雙穗瑞穀九十五本諏日獻

廟群臣稱賀  
欽惟

皇上道高千聖德配兩儀精禋以格

重玄茂膺繁祉欽時而錫庶福屢頌豐年恭覩嘉禾  
之薦生益占協氣之駢降金稔擢穎千箱喜咏於



堯衢玉粒抽英六穗慙稱于漢史彼赤烏神雀其  
羽不可為儀而甘露紫芝其實無裨于用豈如仙  
種允日麻徵矧萬寶告成之期適四方來賀之候  
珍禾薦瑞仰惟

上帝之居歆少昊司權爰值群生之奏績靈鍾

帝苑實萬國之具瞻數合純陽彰

用九之盛治介茲景福聿表貞符至治馨香奠

皇圖於磬石太平熙皞躋

聖壽於乾坤昔河清之頌侈於宋臣有年之書光於

魯典我

皇祖龍門之瑞產實儒臣解縉之敷詞播之樂歌編

諸史局臣欣逢豐穰茂對泰階拜手颺言跼躬獻

頌頌曰

穰穰

聖皇德配穹蒼握符撫運軼蹤姚黃風宣樂鬯皇路  
平康於赫

重玄誕命繁祉百神効靈翼我皇軌二儀莫極五緯

順晷含生阜熙休徵萃止厥徵伊何爰有嘉禾同

本異穎保合太和鍾靈

仙苑托根唯叢鄒生吹律神農播種濟以鬱儀鼓



以豐隆滕六灑潤巽二扇融望之油油卽之芄芄  
太史諏吉后稷獲之司徒獻之

皇則受之我

皇撫謙曰唯

玄佑惠我蒸民介茲景茂殷薦

祖考肆顛

穹昊爰卜鴻圖明徵定保在昔有周矢歌如坻亦越  
唐叔獻于天子矧茲貞符實昭懿美肇產龍門篤  
我

烈祖宣基定命化流率土詞臣奏頌媿隆吉甫我

皇纘之齊聖光前秉圭輯瑞應圖履乾自今伊始壽

億斯年

大中丞塗任齋公平寇頌

并序

大中丞西蜀任齋塗公開府八閩三禩于茲矣先是  
倭夷縱橫海上俶擾內地前督撫諸公相繼驅逐虜  
劉大創而去而籌海之畧所以奠萬世久安長治者  
公任藩臬時固已殫思經營之矣至督撫

命下卽簡將領蒐卒乘汰冗濫議歲餉謹烽斥分屯  
要害申畫封守士卒壁壘旗幟精彩皆變匪特疆場  
之內枹鼓不聞卽廣賊如魯一本者倡亂潮惠數千



里驛騷直犯會城然相戒不敢片帆入我閩封者知  
有長城在也按臣建議欲滅魯賊非公不可

廷議是之遂有會剿之 命公受鉞卽治戰艦建旂  
旄閱虎校勒部隊直下清漳躬擐甲胄應機制變動  
若神明自大將偏裨而下悉授方畧乃大合三哨之  
兵三戰于銅山柘林蓮澳之間賊殊死戰我軍勇氣  
百倍俘斬殆盡與廣兵犄角遂生擒魯酋餘醜悉平  
解萬姓困瘁之嗟紆 九重南顧之念公之壯猷爍  
乎有光前烈矣自古定傾勦亂建懿卓之勛者必布  
之詩歌被之金石某才謝孟堅敢勒北征之頌詞乏

子厚多慚皇武之章敬述公平寂之槩獻頌一篇頌  
曰

岷峩表鎮井絡莫辰精感紫府爰篤哲人維國之翰  
維周甫申允文允武爲

帝虎臣 帝御寰宇九有率賓雕題辨髮罔不貢珍  
蠢茲妖鱷揚波海濤奔突橫潰流毒我閩

天子赫怒簡帥遣戍矯矯中丞實摠戎務爲召公虎  
爲裴公度秉鉞受賑建旄伐鼓樓船萬艘截彼潮浦  
迅若雷霆降如時雨犄之角之深入其阻中丞休休  
緩帶輕裘沉機變化樽俎訐籌一月三捷殲厥巨酋



石室秘抄 卷五  
四  
織塵汎灑海若懷柔淮蔡格唐江漢寧周伊昔鬼方  
三年始克中丞誓師滅此後食曾不逾時罪人斯得  
磨崖勒勛銘于罔極洗劍瀚海掛弓扶桑遐荒底定  
于理于疆獻俘告廟功紀大常  
天子頒賞大開明堂授之袞職翊贊  
垂裳

命論

漢武帝至郎署見一老郎顏駟者鬚蒼皎白自言其  
文帝時爲郎文帝好文而臣好武景帝好貌而臣貌  
醜陛下好少而臣已老是以三葉不遇也唐盧照鄰  
亦自謂在高宗時尚吏而已獨儒武后尚法已獨黃  
老后封嵩山聘賢士而已廢然文帝拊髀而思頗牧  
未嘗不好武高宗東封而徵處士未嘗不好儒二子  
之不遇命也自昔聖智賢豪之士或屈于莘媵困于  
鼓刀阨于版築老于涓濱至屠販奴隸乞食囚虜至  
辱人賤行矣一旦乘風雲之會建社稷之策勛勒鼎



彝名載錄豈拙于昔而巧于終實命之曠于前而  
通于後也夫人稟受于天有靡顏膩理哆嚙頰頰而  
好醜殊其形有睿通神明辨昏菽麥而清濁殊其質  
岐嶷定于始誕豺狼肇于初生而善惡殊其性試啼  
而識英物夢豎而胎祖宗福極興衰殊其兆此蓋皇  
降之初賦予有定所謂命也譬之物然鰾聚群分區  
以別矣蕭艾不能化爲蕙蘭鶉鳩不能化爲鳳凰朝  
菌不能化爲大椿也命之一定不可易猶物之一定  
不可變也故上智下愚之不移聖狂舜跖之懸絕有  
萬不可齊之品負乘而居高位直道而沉下僚饕餮

而享千鍾寂寞而甘一瓢富若猗頓貧若黔婁脩若  
容彭短若殤子有萬不可齊之等論者謂吉凶由人  
皇天輔德蓋以明經拾青紫桓榮稽古之力也而不  
知鄭虔命薄如三絕何投筆覓封侯班超威遠之畧  
也而不知李廣數奇如失道何伍員知也浮于江流  
屈原忠也沉于湘渚賈誼才也鬱志于長沙汲黯直  
也白首于主爵司馬長卿以詞賦得幸終于文園崔  
亭伯以頌見知卒于岑長乃若蘇秦掉三寸而佩六  
國之印蔡澤騁片辭而代應侯之位朱買臣五十始  
富貴管公明四十八而數盡王父偃歷說不入見棄



州郡一旦朝上書而夕召見既以五鼎食亦以五鼎烹仲尼適趙臨河而歎不濟命也子輿在魯見沮而歎不遇天也聖賢不能違天與命彼數子者或先號後笑或始吉終凶或不求而得或窮焉終身方其未遇如水沃石不能入也及其既遇如以石投水莫之逆也遇則爲虎不遇則爲鼠得時則龍興致雲而雨天下失時則陸居爲螻蟻之所制故曰窮達命也否泰運也通塞時也歿生有命富貴在天其是之謂矣論者謂君相造命命不在人也夫富擅銅山之錢一簪不着身雷轟薦福之碑一字不得售汪玉山知貢

舉不能私一友人蘇東坡亦不能私一李方叔謂造命何君相能與人富貴亦人之命適與之相值也唐莊宗曰待予心肯日是汝命通時此造命之說也然歷陽之都化爲魚鱉睢河之卒水爲不流豈皆命歟此蓋天地之劫數變也變非正命也火炎崑岳礫玉共燬嚴霜寒零茅芷同悴王允論術所謂遭命者也韓退之曰我生之辰日宿南斗牛奮其角箕張其口蘇子瞻自言生時與退之相似退之磨竭爲身官予以磨竭爲命官今觀二公生平遭讒貶謫行止相似非命使然哉列子力命篇言命無有制之者自壽自



存室和抄 卷五  
天自窮自達自富自賤自富自貧非力之所能爲也  
然則將聽其自壽自夭自窮自達自貴自賤自富自  
貧有心以徼福不若無心而任運已乎蕩蕩上帝民  
命攸司固降觀不忒亦報施靡常謂爲有知耶則顏  
淵天歿盜跖壽終爲無知耶則作善降祥作惡逢殃  
孔子曰富貴如可求雖執鞭之士吾亦爲之如不可  
求從吾所好聖人樂天知命是以舍彼取此于公高  
門而容駟馬嚴母掃墓而歸東海天命豈僭乎詩云  
皇矣上帝臨下有赫神之聽之好是正直豈第君子  
求福不回定命之謂也

辛酉廣東同年序齒錄叙

嘉靖辛酉廣東諸士舉於鄉者七十五人乃偕而合  
燕齒讓志諸錄以示不忘諸士奉而請予序之予曰  
讓之德美矣昔虞廷咨岳拜而稽首讓于稷契垂益  
朱虎夔龍孔門講業之徒身通六藝者七十人時惟  
顏淵窈窕而少而同門列爲四科則顏爲稱首雖賢如子  
貢亦自推讓之不敢望焉而回亦退然若愚若無諸  
士子挾其文就試王司而王司亦錄其文列其名籍  
是故有長而瞠乎其後者有少而哀乎其前者旣燕  
鹿鳴矣茲而畧王司之籍崇長幼之讓抑抑然秩秩



然敦其倫序舍其驕吝若填箎之迭奏也金石之相  
宜也和之至也紀生紀字紀鄉以聯異也紀親紀配  
紀嗣以合愛也厚之至也故錄成州閭鄉黨稱其孝  
也兄弟親戚稱其慈也故曰讓之德美矣抑予有進  
焉昔稱經術文章惟西漢竄著吾觀賈誼公孫弘司  
馬相如輩所爲文章非不爛然見知世主矣至論勲  
業則無文絳灌卓然獨宥西京而同時如申培伏生  
轅固皆老而明經爲漢儒宗名列儒林故士立名貴  
真母眩于實矣諸士俱以鴻漸之翼乘時自奮昔各  
居其鄉一旦同遭振濯迴翔寥廓茲且升南宮對

大廷服官政無論名位先後倫序長幼文章潤色乎  
皇猷勲業昭垂乎彝鼎以友天下士與稷契夔龍朱  
虎揖讓虞廷展采錯列非特今日一鄉齒讓已也此  
其立名之真自樹之卓他日以予言爲左券斯意愈  
有光矣

奉賀大宗伯座王濤翁董老先生七十六壽序  
士遭明盛之世得天地淳龐純固之氣具天縱出類  
之資乘時龍躍以自奮于青雲上結主知下符民望  
而能成天下之大忠萃天下之大美享天下之大名  
從以孫子申錫無疆此蓋天心之所篤祐古今之所



希邁者也在昔伊尹佐時阿衡而子伊陟復相大戊  
呂望爲周尚父而子呂伋爲天子虎賁氏世表東海  
周公歷相武王成王而子孫分陝而治錫胙東魯是  
三聖人者壽皆百餘歲而忠勤才美顯名福履之盛  
非所謂古今希邁者哉然或老于涓濱屈于莘媵居  
于危疑憂患其值世運艱虞不得雍容都兪于廟廊  
之上則三聖人一也在易大有之上九自天佑之吉  
無不利言人臣際大有之世居上位而信順協乎天  
人天固絕佑命之矣若吾師董夫子其得天之純  
者乎夫子應

世廟辛丑 大廷之對擢上第入詞垣讀中秘書醞  
釀經笥囊括史乘旁羅諸子百家含英咀華充然有  
得也

肅皇帝躬脩玄嘿夫子入直承明小心敬畏供奉文  
字咸稱 上旨獻納輔養基命宥密

肅皇帝一德格天茂膺繁祉則夫子朝夕啓沃之也  
斯不亦成天下之大忠乎聞望表儀乎朝著文章黼  
黻乎

皇猷學術甄陶乎士類經綸贊畫乎

廟謨掌成均典文衡所得文武士布滿公車以今巨



公名將爲國家棟梁干城實夫子後先推轂之也斯  
不亦萃天下之大美乎踐金華文石之班負泰山北  
斗之望被容接者如登龍門承顧盼者卽倍光價片  
言隻字世共珍之海內士咸願爲執鞭斯不亦享天  
下之大名乎

肅皇帝神聖群臣莫及夫子以文學侍從依日月之  
光 寵數優渥 錫與繁縟入奉 爐香出趨禁密  
不出長安門二十餘年歷踐清華以至大宗伯誠儒  
紳之至榮爲臣子之殊遇年未六十鑿柱下止足之  
戒乞身投閑優游綠野之堂暢適平泉之墅文子文

孫相繼登第並列華宴甲第侈乎三世簪纓耀于一  
堂華誕之辰四方來賀而以望謝

闕廷夫子拜乎前子孫拜乎後夫子進萬年之觴子  
孫進千歲之觴金紫聯翩忠孝濟美南陔交奏乎賓  
筵歌頌鏗鏘乎金石踰踰乎濟濟乎猗與盛矣其敬  
誦皇矣之四章曰既受帝祉施於孫子夫子其得天  
之純亘古無兩者哉昔文潞公年八十餘起而平章  
軍國事夫子精神強健永錫難老

聖天子且召夫子勉爲社稷蒼生一出哉由此而八  
十則師尚父授丹書之年也由此而九十則衛武公



作抑戒之年也又百歲而上則廣成子黃帝訪道之年也夫子壽而上壽

聖主下壽兆姓大行禮部君繼序其皇中壽子孫書曰天壽平格請進純天之觴以祝夫子百千歲壽

送邑侯董貞復父母入覲序

先王建國序賢而以職業事守勵天下有司每三歲賓之以朝聘之典考群吏之治天下群吏各以其職籍而獻之天子之廷考成事焉制也明年癸未當大計邑侯董貞復父母將籍其所脩職業入覲侯泄吾邑四年所矣異時爲令者率三載考績得召入爲臺

諫次亦爲郎署

今上勵精重親民之官嚴久任之限依倣漢制著爲令甲史稱漢世盛良吏予讀循良傳兩漢良吏祀著者屢屢數人皆刺史郡國守相也以令稱者獨王渙劉寵孟嘗劉矩童恢止矣攷其所爲治狀則發摘奸伏簡除煩苛辨孝婦之寃敦禮讓之化耕織種收皆有條章平平耳無甚殊絕也當其時百姓歌頌之壘書褒美之稱爲神明沒世不忘是遵何德哉則以忠誠固結而精通於民也以予觀賢侯德政視數子豈不赫然稱盛烈哉聞諸長老言吾邑自嘉初正弘以



前民務力田俗敦儉朴市井嬉嬉家給人足彼何時也逮倭夷煽禍肆虐劉之慘材官分部式遏竅虐民出錢以佐縣官於是始有養兵之苦厥田下下一遇歲溢四郡之水勢若建瓴數千畝沃壤變爲白墳民出息以輸歲額於是始有浮糧之害閭閻困乏譬人病虛外強中乾而號令煩數賦役滋興民於是始有萋楚之嗟時方務一切綜核之政文法操切察見淵魚爲吏者日恐恐然督責之虞寬之則事不集名不立稍嚴則民不堪怨易起令誠難矣侯自下車焦勞其思慮疲竭其精神本之以和易惻怛先之以勤儉

正直酌條鞭四差之法而稅歛以平定清丈三等之則而農畝以均杜里胥侵漁之弊而公賦以充省追呼勾攝之擾而山谷之雞犬以寧民始帖席眠矣侯以久於其職熟知民間利病田土沃瘠戶口登耗富者不得詭籍避徭貧者不至以其身踐更人服其公片言解堂下之紛囹圄無久淹之獄人服其明清脩之操久而彌厲居庭矚然卽米鹽之微不煩里旅常日令實生民詣浚民以生乎有可以佐百姓之急者利爲之興害爲之除民亦謂不可一日無侯也所謂忠誠固結精通於民者與邑有君子有小人君子曰



惠我無疆子孫保之小人日鄙人何知嚮其利爲有  
德我有田疇則子產之治鄭也民之父母則召信臣  
杜詩之治南陽也尸而祝之社而稷之則庚業楚之  
居畏壘也以是籍而獻之 闕廷治行卓然爲茂異  
之選

聖天子臨軒問遐方風俗生民疾苦則以民所稱便  
邑所施行者以對行且召入諫垣爲侍從之臣以其  
治邑者舉而措之將天下蒙其福矣

寶鏡篇贈復初極上人

佛氏以空示精要與吾儒所謂空空何殊夫洞然無  
物之謂空有物卽非空矣物卽佛氏所謂幻有幻卽  
非空矣然吾儒之空有主而實佛氏之空無主而虛  
其於入道均也達磨面壁九年所見皆壁也食息起  
居壁也夢想智識壁也無天地晦冥無日月晝夜無  
四時寒暑無萬物色像無山河大地惡有所謂壁無  
眼耳鼻舌身意無色聲香味觸法無眼界無意識界  
惡有所謂壁是之謂真空六傳有惠能者作偈曰菩  
提本無樹明鏡亦非臺本來無一物何處惹塵埃惠  
能識本來面目悟無物宗旨歸寂于寶林可謂還其  
真空一種寶鏡落在人間極上人齋心法門藏脩芝



山寺自號寶鏡吾鄉善信衆生延致于復初禪林來  
謂南臺居士語之曰上人知寶鏡之說乎夫鏡惟空  
故明必鍊以銅錫參以龍虎和以陰陽去其昏翳然  
後本體清明而靈境內照也真空故也性體本空以  
真如爲銅錫以頓漸爲龍虎以止觀爲陰陽祛三毒  
六塵之昏翳誦心經而悟般若誦金剛而悟無住誦  
法華而悟三車由精鍊而清淨而光明由戒而定而  
慧由脩而悟而涅槃視世界一切皆歸真空斯大圓  
寶鏡不染不着在吾方寸空中矣經云照見五蘊皆  
空有旨哉有旨哉昔韓退之在海上與大顛三書羅  
致之陶淵明與惠遠爲蓮社之會此皆世所歆尚予  
嘉極上人清脩戒行作寶鏡篇貽之

享帝集序

予昔計偕春官與東臯同舍郎同文社東臯積學玄  
悟冲襟藻思予得見其文辭縝藉醲郁博雅君子也  
心嚮往之已乃別去宦游四方且三十餘年所矣東  
臯訪予於道山石室出平生所爲詩篇相印證屬予  
序之曩予領雷陽郡符建節松維東臯三以詩見貽  
惠我瓊瑤未有報也今讀其全集貫穿諸家取裁拾  
遺璀璨炫目爛然盛矣明興二百餘年通有作者弘



正間李何輩善鳴一時在今日則李濟南王蘇州徐  
吳興宗廣陵吳興國各擅所長旗鼓中原操觚之士  
爭豔慕下之予嘗讀圖謀五嶽之尊表鎮區宇登之  
秩祀載之詩書非以其靈標峻極在方域中乎次則  
匡廬九疑會稽禹穴峨山司馬遷之所徧歷乃若鳧  
嶧虎丘九華黃山仙都赤城金焦諸名勝五嶽培塿  
耳以其在通都大邑輜車相望騷人墨客托之賞心  
擗管摛詞闡發靈闕而山之名益以顯融至於溫之  
鴈蕩閩之武夷粵之桂山皆奇秀甲天下王者不以  
登封漢唐諸名家未有以入詩品者非謂其局於方

隅冠蓋罕至耶士之所處亦猶是耳使東臯在中州  
當與數子者並建旗鼓爭鳴當世也何至良賈深藏  
白首猶談博士荼耶東臯蚤歲遊南雍有志慕古蓋  
嘗登鳳凰臺狂歌嘯傲氣隘六朝北上金臺伯樂未  
遇詣公車分符保寧出長安門東瞻泰岱歷齊魯之  
墟遵太華潼關徘徊周道吊萇弘之墓由閩中劔閣  
入錦城訪陳伯玉讀書臺杜子美草堂司馬相如楊  
雄故宅謁文昌之宮讀紫府遺文周瞻峨山下巴渝  
瀼西徜徉子美卜居過白帝觀諸葛孔明八陣圖順  
流而東泝瞿塘江陵彭蠡登黃鶴岳陽樓歷覽無際



浩然而歸充然有得也稅駕故廬屏居極樂寺慕虞  
卿著書自適恬如也身所涉歷吊古揮毫寤寐往昔  
其氣逸故其詞瀟灑其思深故其詞沉鬱其志邁故  
其詞悲壯要其矩度則自學杜而有得也排律近體  
肆筆輒成百餘韻自韓退之南山杜子美北征夔州  
詠懷等篇不多見也子美在當時與李白齊名平生  
奔走窮愁觸景輒形歌咏人未之知至元和間天下  
爭誦元白而於子美反加詆議及退之有光燄萬丈  
何用謗傷之語元微之又極推其盛謂非李可及於  
是杜詩始盛傳爲海內宗工漢楊雄祿位容貌不足

動人太玄法言時無知者獨桓譚以爲必傳文章之  
取譽難矣予讀享帝集愛其體裁音節可謂唐調固  
信其可傳也東臯同邑國初張翠屏以寧官翰苑有  
翠屏集行于世宋景濂爲之序謂爲一代奇作今學  
士大夫皆知有翠屏予謂二集當必並傳士之品固  
不以地軒輊也

桂林雜紀序

國家承熙洽之運宇內奠安文武臣僚得以其暇怡  
情山水之勝遊心翰墨之場自托于子卿墨客以撥  
藻其詞華鏗鏘乎金石縉紳大夫相與效慕而矜艷



之可謂榮遇矣如使烽燧起疆圉羽檄馳轅門方將  
書討軍實夜運帷幄手提鈇鉞之嚴身蹈蛇虺之窟  
如東山之怡怡不歸采薇之不遑啓處卽橫槊賦詩  
倚馬占檄何可得也吾聞大都護寶江王公以武第  
起家垂二十年北自燕薊涉齊魯南連三吳兩浙閩  
粵皆公建牙地也嘉靖甲子以督漕洋運至漁陽登  
盤山喟然思李衛公舞劍遺蹟時年三十已負封侯  
之志矣上泰山歷秦觀越觀觀日出處下瞰溟渤周  
攬北極陟金山北固望長江天輒南遊姑蘇虎丘嘆  
夫差鷓夷之不終校獵秦駐耀兵蛟川上會稽探禹

穴遐想勾踐夫椒之後增脩德政滅強吳光禹舊荼  
梯鼓山崩遠眺海岳諸夷而喜昇平之遘會遵衡  
嶽窮桂林七星六洞之秀平生身所涉歷極海隅夜  
郎之域山川如故世代屢更興衰靡常感慨係之矣  
一觴一咏有雅歌投壺緩帶輕裘之風揖祭征虜羊  
鉅平于千載之上漢衛霍營平矯矯虎臣今讀大將  
軍柏梁咏郡國士馬羽林材和撫四夷不易哉風雅  
之遺也營平至金城上方畧留屯狀渾雄簡重時建  
元神爵之間天子方有事四夷故其文詞不可多見  
孰若公遭極盛之世折衝樽俎之間意氣雍容文詞



瀟灑公所自叙亦云幸際明時謬微知遇可不得榮  
遇乎哉其所爲文飄飄有凌雲之想使遇司馬子微  
必以爲仙風道骨可與神遊八極之表者也公嘗收  
陳錢之績奏八寨之勛

聖天子嘉公鴻伐玉帶麟袍寵遇隆矣年方五十尚  
當鳴劔伊吾勒石燕然分茅錫胙鐫名鼎彝是紀也  
詎足盡公哉

在松潘寄福建巡撫譚二華書

煖家省城去歲歸見鄉長老輒言兵火之後百姓苦  
遭夫甲及當大日之害夫甲者編驛傳夫首僱夫馬  
供廩糧也當大日派里長分當日子荅應使用也自  
嘉靖十三年以前審均徭之時將徵糧多者編僉驛  
傳夫甲謂之私當不勝應役之苦郡守胡 議罷私  
當通將苗米每石徵銀三錢納官發驛給與夫保荅  
應夫馬廩糧造數支銷行之二十餘年民甚便之舊  
規審綱之時將徵糧通融每丁石各縣派銀七八錢  
不等徵納在官遇有公務支辦民亦辦之是無當大



石室私抄卷五  
日之名也後因倭患用兵驛傳每三錢外加增六分  
一時權宜之術也此外又將糧多者編充夫甲令其  
僱人夫供廩糧雖云官亦給銀而私賄無筭是既納  
銀在官又使民私當此夫甲之害一也以綱銀應答  
不敷又派里甲分當大日里長取之甲首一兩增至  
三四兩者甚至將綱銀侵隱令里長空手私賄此當  
大日之害二也罹此二害鮮不鬻產者夫百姓數年  
連遭寇亂間井蕩然譬之羸病之夫宜投參朮以培  
植元氣而乃飲以烏啄是速其斃也今賊平民方離  
湯火如赤子之歸慈母聞 公有惻然拊循之念僕

叨教愛日擊二害敢吐鄙懷敝戶丁米不多例叨優  
免本非私言惟

高明俯賜詳察裁奪地方幸甚下情冒昧塵瀆無任  
惶悚

譚公得書即日查革夫甲大日

寄趙寧宇中丞書

從人還得十月念日書知秋杪已抵家慰甚翁車輒  
暫停得遂承歡之願卽三公不易矣教札云二十餘  
年盧生之夢始醒聞之李太白日處世若大夢胡爲  
勞其形在塵世中皆蕉鹿也醒者幾人哉



聖天子寤寐求賢翁負海內蒼生之望出膺節鉞入  
秉樞衡廬生之醒當復爲周公之夢矣東山非久臥  
時也矻矻俟僕寓形宇宙之內沉冥幻妄之場學  
道猶隔兩塵此生徒輕一擲荏苒老矣猶在大夢中  
矣翁何以覺之際違數千里寄之尺牘餘情縷縷尚  
托神交不盡

上座王大宗伯董澍翁書

文煇以文章未技授知門下二十年矣古人云生我  
者父母知我者鮑子夫子於不肖有罔極之恩焉竊  
謂王司掄材譬之樹木矣樹桃李謂春玩其華夏食

其實也樹松栢以需大厦也煇自郎署歷郡守以至  
今官上之不能籌一畫吐一奇以禪國家大計次之  
又不能承宣主上之德以义民阜財安內攘外厯厯  
然無尺寸微勞以自表見卽無論材大厦雖玩華食  
實亦非所望焉門下先後所取士樹材多矣如煇弗  
克自樹以負知遇之恩門下猶勤收錄不以散木遂  
棄之煇雖朽質敢不思自磨濯少効涓埃寧忍自棄  
而甘爲匠石所弗視也壬戌春徙松潘始以母老蜀  
道之難卽圖疏請附于令伯依劉之義有私謂曰松  
州邊鎮簡書可畏謂何煇卽傲然懼絕裾叱馭行矣



入松鳥道羊腸懸巖疊嶂瞿塘劔閣寔安流坦途也  
塞下嚴寒雖盛暑亦披重裘氏老雜處卽唐吐蕃遺  
種乃今部分各自雄長可以羈縻服兵威屈也比歲  
豪酋獷悍負險跳梁每犯輒得氣去邊防坐是漸壞  
夫圖目前苟安不卹他日利害是皆自營非爲公家  
計也筭兵食練戰士繕亭障遠斥堠來卽勦之每一  
發兵頭須爲白茲且稍稍款輯矣日殫經營之力務  
求安攘之計俾西土救寧亦不負門下樹一士矣第  
念老母頽齡久違清溫音書斷絕腸一日而九迴復  
何心沾戀利祿哉

聖朝推恩親年七十以上一子例得侍養門下諒其  
懇情得如例請蚤迴王馭萬里之危以遂潘輿一日  
之樂則生我者又賴知我者以全恩莫厚焉夫子蚤  
晚入政府矣所樹衆材大之爲棟梁小之爲榱桷意  
所取裁各適於用如焮者得以樗櫟長養山林敢忘  
大造生成之賜哉

又

文焮丙寅歲賫捧至京附盛使啓侯荏苒再易韶華  
矣緬惟老師結盟香山優游綠野著書立言垂托不  
朽間娛情於琴書詩酒如歐陽公晚年六一自適莊



生所謂恬愉相兼自養誠縉紳遐軌名高山斗壽比  
喬松矣今海內稱文章宗工必首歸夫子被容接者  
若登龍門經品題者卽作佳士片言隻字世共珍之  
昔楊子雲作玄經法言門人侯芭從之居受業焉故  
芭之名得附子雲傳于後世吾夫子文章馳騁先秦  
兩漢晉魏盛唐之間直掩蔽古人凌駕後代太玄法  
言云乎哉子雲于詞賦有悔少之嗟曰壯夫不爲也  
若文煥自悔壯已不爲老冉冉至矣卽欲畏糧躡蹻  
就質門墻如侯芭之事奈上嬰令伯之情下係向平  
之累寤寐嘗溪徒增浩嘆矣昨歲徙官楚臬不意以

前任致有人言吏部查覈歷年薦剡未遽譴斥覆令  
聽勘在文煥母老久已灰心林泉敢復他望竊惟任  
蜀五年量制羗夷矢竭討賊但知昂然任事期不負  
生平不知委曲趨時致橫遭口語人臣爲國家効忠  
宣力至爲忌者操切含冤九原蓋自古嘆之况文煥  
實庸劣無補明時者哉得返初服亦誠幸矣自受知  
二十餘年風厲曲成靡所不至謬蒙國士之遇未効  
涓埃之報此則有負知我者矣夫爲文旣茫然爲吏  
復無益男兒生不能成名歟直草木等耳尚何言哉

又



奉違台範十有四年矣丙寅歲賫捧到京得遇盛使  
曾附尺牘續有陳生者往施大尹之便亦僅一通訊  
嗣後飄零之跡愈遠愈疎接貴鄉士夫輒得起居萬  
福具知杜門却掃日事著述將藏之名山昭示來世  
龍山公子高薦畿闈及令孫秀穎異常種種多賢顯  
庸濟美此王晉公持左券以取必於天者老師具有  
人間完福矣喜慰如何某自受知三十餘年以蚤不  
樹立陸沉至今向任西蜀擒土酋平積寇皆身履戎  
行頗効微勞緣不得直指之心爲所掩抑且復加以  
萋斐之辭幸公論昭明以原職量移才非適用行不  
通時茲且三年稍復故物漏盡鐘鳴猶覩然竊祿徘徊  
藩臬之間燭之武曰臣之壯也猶不如人今老矣  
無能爲也某之謂矣老母在堂忘親遠遊每一念至  
心如懸旌尋且陳情歸而焚香遙祝老師壽臧昌熾  
峴山雪水世業俱長矣沈玉陽行特附申候東望台  
光可勝瞻邇

又

不奉光儀二十餘年矣小兒回備述老師晬容豐下  
雙瞳炯炯神仙中人也遙隔數千里外注念而不克  
見得聞兒子如挹顏範足解勞結且承宴好款密誨



語諄至而禮部復惓惓接引歡若平生真家人父子  
相聚一堂淺薄何幸得附門墻而結累世之緣也教  
札云兩地際別越三十年人生百齡大槩虛語縱其  
實有而彼此乖離復三之一讀之愈增感愴吾夫子  
盛德獲福祿位名壽皆天所眷無論上古聖賢淳龐  
遐筭卽繼世如漢竇公歷魏文侯至漢文帝二百八  
十歲魏羅結一百二十歲唐李元爽一百三十六歲  
蜀范長生宋譙定皆百三十餘歲此百齡以上人生  
實有非虛語也吾夫子天縱之厚非數公可及其爲  
仁壽當遠過數公矣其餘生之年日覺衰頹所謂三

之一者又不知後來有幾矣夫子前書謂素少宦情  
尤乖俗好後書謂和長輿所謂拙馮敬通所嘆窮夫  
子其知之矣某自歷官郎署而至藩臬生平守官盡  
職不敢自負明時在松州值土官之叛蜀事岌岌矣  
親領松兵平之故相有所厚姻親武弁啓釁被幕府  
叅論謂某具揭某正色斥之直指出京密受意旨至  
會審日攝微語欲特出之某不能承望風旨以致乖  
忤時已陞湖廣總憲橫遭媒孽之論及招成其人潛  
逃至京足未及邊妄冒薊遼首功准復原職而某構  
陷矣在蜀三年鎮西羌平龍州平支羅微功悉爲掩



抑發難者安排難者危謂公道何至部勘得白再補  
粵中稍復故物銓司推陞啓事輒爲沮格某亦以母  
病危篤乞歸例應起復筮得晉之初六有晉摧之虞  
及炎炎火滅則流光易邁冉冉老矣安能復叩首伸  
眷翱翔藩臬間乎此某之不諧時好以拙取窮也夫  
子愛之甚勤望之甚殷身所遭際若此無緣得至墻  
屏痛布心曲君平棄世豈其本心夫子知我有負藻  
鑑已矣已矣昔人謂無金張之援子孟之資而欲高  
富貴之榮望殊異之寵是隴西之游越人之射耳以  
今觀之豈異往昔者哉暮景寂寞婚娶未畢柱下漆  
園百世之師稽叔夜吾益友也心竊慕之近卜一小  
壑在委巷中可避紛囂頗有山林之趣真爲隱者之  
宜朱文公書石室清隱四字於岩石歲久在糞壤中  
搜剔得之信如有待也杜門養拙讀書自娛時與二  
三舊侶一觴一豆叙疇昔之歡良辰美景散步郊坰  
與農父話桑麻忘情物外視世之榮辱得喪一切置  
之度外息慮泉石之盟絕意鍾鼎之事以夫子遠念  
故吐其肝膈縷縷心事托之尺牘肆筆攄懷臨緘增  
悵

寄禮部董青芝書



天將寄大任於斯人必與之以特達之資在幼稚時  
卽見崢嶸前輩程李二學士年纔十二以神童舉占  
對不允後果以文章經綸名世向貴鄉中丞陸非川  
公以事至閩僕詢老師動定陸因言有孫奇特異日  
必爲偉器蓋指門下也時在隆慶四年計門下甫十  
歲已自表異如此後見題名士籍知門下也登第入  
華省矣陸公可謂知人哉僕意門下少年登高科爲  
美官當必高視一世可仰而不可攀及小兒回備云  
門下雅量冲襟接引之勤虛抑之度畧勢分忘形骸  
通家弟兄視之惠之字扇復贈之詩軸歸而張之中

堂凡士夫見者咸嘖嘖稱賞愚父子光榮多矣感謝  
感謝僕自受知老師歷官三十餘年偃蹇留滯無絲  
毫表樹冉冉老矣兒子俱愚魯無成惟願老師福履  
駢臻龍山尊公偕門下努力明時爲國家宣猷爲蒼  
生造福僕餘生之年眼見相門繩繩濟美柱石清朝  
僕憑藉寵靈何幸如之山川脩阻雖不能至心嚮往  
之千里神交仰祈台照

寄大司徒劉三川公書

某賦性迂戇兩任西蜀屬有疆場事昂然以身任之  
靡卹其他可謂愚甚矣翁不惟不罪斥之又薦拔之




至有經文緯武長馭遠駕之稱此豈某所敢當耶翁蒞蜀未踰年無論興利剔蠹軍民並受其福卽出鎮渝州五旬兩平巨寇易其危而奠安之凱旋之日父老兒童焚香載道舉手加額願翁世世子孫吏茲土也翁勲庸實在社稷矣鄢藍之功足論哉然猶不免嗷嗷之口信任事之難而萋菲之可畏也賴

主上明聖溫旨慰留翁之心事真如青天白日無損高明矣某昔在松潘置制羗夷兩年之間士氣振揚群蠻款附龍州薛紹乾叛逆劫制將攻關堡全蜀震動某提松兵會勦出其不意夜半潛師渡河大破賊

衆於鐵龍橋擒獲叛酋保全將領支羅之役蜀人初議以爲賊寨險峻功難猝就某陰遣偵諜得其險易分兵三道啣枚夜發直抵賊巢以身冒不測之險與賊對壘賊欲劫營者屢矣倘變起倉卒身卽齏粉時湖廣按兵主撫蜀以新調土兵獨當方張巨寇攻之月餘不援彼時亦苟且就撫則支羅終爲賊巢西川腹心之疾殆未易除也某力任討賊晝夜籌畫審彼已之宜握擒縱之法誘其酋首質其妻子解散黨與密結內應仰仗

朝廷威靈一舉而掃巢穴數十年妖氛廓清皆賴本





院神筭將士協力某亦預有微勞也今諸將之功未及叙錄而龍州破城官軍旣以誣賊坐罪某復以貝錦構殃人臣奮萬死不願一生赴公家之急而全軀保妻子之臣隨而媒孽其短每讀史輒扼腕嘆之不啻復見于清明之世也被論之人本不宜輟自鳴額但論者若謂某庸劣無補明時罷黜固宜至以飛語相傾加之賕賄舉其平生棄之晉王濬曰吾懲鄧艾之禍不得無言某在今日亦不容不言耳伏望廟廊之上主持公論憫落阱之疾呼垂覆盆之末照使孤危之臣不至枉陷他日爲地方任事者亦不以某爲戒矣

寄殷克齋中丞書

某承乏貴省竊幸地方救寧與非才相宜可以偷安竊祿不擬至建昌得調嶺西之命馬首遂東矣到五羊警報日聞米一石至價一金兵荒頻仍大異往昔所幸高涼諸倭漸次虔劉而廬井蕩拆原野蕭條惠潮諸賊雖稱聽撫未見投戈解甲恐襲往年故智矣督府石翁日夜籌畫選將調兵誓清南粵以朝廷威靈文武宣力蕩平有期矣某分劄高州當流離瑣尾之餘爲勞來安集之計且山賊盤據阨塞與羅旁俱



屬心腹之疾方議召狼兵搆之此皆嶺西事也許瑞  
近在陽電等處得倭功二百餘解報頗為我用果如  
明公所料但不知後日何以為散之之謀其他群酋  
陽順陰逆者尚多茲造戰艦練土者當必次第舉矣  
救省地方幸賴德威宣暢海宇寧謐寒家仰荷睟矜  
之安遊子得免內顧之憂拜賜多矣馮便謹此附候  
方有高原之行匆遽不盡

又

文煖自兵曹晨夕趨步欽仰徽猷嚮往久矣乃今秉  
鉞八閩下車兩月興利剔蠹惠愛徧被於窮阨選將

練兵威稜遐暢於海徼方叔壯猷召公維翰公非其  
人哉承示古田兩廣二疏披誦再三誠經畧之宏謨  
治安之至計在古田用之既効矣而兩廣正今日對  
症之藥僕謂東廣之禍蓋由數年因循玩愒至使山  
海之寇乘虛外攻聽撫諸賊養疽內潰近來時套輒  
以招安為長策戛之特不殺人耳而結塞擁眾占種民  
田強勒報水百姓畏賊甚於畏官輸賊急於輸稅亡命  
失業之徒歸賊有如歸市奸民利賊厚售潛通禁物  
遂致有徒寔繁火器俱便釀腹心之疾養虎狼之毒  
將來之禍不可勝言則招安悞之也故在今日若非



遣將調兵分屯要害務在搗巢草薶而禽獮之東廣  
決無安枕之期矣承教招撫林道乾用其一以脅其  
餘此以賊攻賊誠策之上也但惟明公威信素著有  
以服其狼心其次則大振兵威有以制其死命彼或  
俛首以受羈縻不然欲一旦籍之爲兵假之名色冀  
其聽號令出効力爲我臂指之使難矣且事寧之後  
能保其入我編戶銷兵歸農否耶春秋敵國諸侯會  
盟至交質子尚不可信况劇賊乎若俟漸平諸賊皆  
之恐此輩狡猾留賊以爲富貴之資非劉巨容故智  
耶僕與翁曾論及此時無任事未及請竟其說今叨  
分藩預有地方之責願聞方畧幸有以教我

又

僻處高涼閩中時事邈不相聞計仁人在位所爲安  
攘謀者甚具遠人得有慰藉矣東廣嶺海多虞往歲  
倭寇陷電城者俘馘殆盡海賊許瑞輩稍稍款附惟  
山賊徃蕩日熾出沒嶺西諸縣鄙人屬有疆場之責  
惴惴然惟恐不足報塞此賊非召狼大舉之決不能  
掃蕩莫安鄙計須募廣西土官有弟男願得地者挑  
選精兵五萬以土官親領至德慶州秋成而入爲東  
西二哨又以一哨入陽春進據要害相度地利團結



石室秘抄 卷五  
營壁爲屯守之計或資糧于敵或裹糧以從鑿石伐  
材就其地造室開建城邑倣趙充國罷騎留屯之策  
分兵追捕先於要路悉以土浙兵把截防其奔突所  
謂貧破其衆坐困數月將餒歿矣仍大張旗榜有能  
投戈歸附者准還故地有能相捕斬者除前罪給賞  
或令招王撫諭彼勢窮食困乞降恐後所謂不戰而  
屈人策之上也土官弟男願留者比照右江九司事  
例授以世襲巡檢屬肇慶府管轄卽許狼人耕種其  
地數年後陞科免其差役其間山川遼曠六十里設  
一營堡流土分秩犬牙相制化奸究爲善良變盜區

爲編戶一勞永逸萬世之利也此與公古田疏議頗  
合至於地形險易敵情堅瑕運道遠近必親履其地  
方可尙上方畧公昔年曾於新興破賊籌之已熟虜  
在目中久矣幸爲鄙人畫之譬之良醫授之以方但  
求濟人不必功皆已出也翔便報我德音臨風耿耿  
與吳仰峯兵憲書

支羅撫勦之說敝省豈不知從撫所省兵糧爲長計  
乎但中賊濟惡不悛兇險特甚所賊殺不辜者殆難  
以數計蓋三十餘年腹心巨蠹矣前各院道撫處亦  
曾以賊姪黃洪達投見姑縱之使回欲其感恩聽撫



竟負固不服非一次也彼其權變知兵雖宋江不過自恃險固所居號爲天城每以智術籠絡上人初聞貴省行撫亦計此賊見大兵彈壓必身自輿櫬面縛詣軍門請降以其弟姪投救省則罪人斯得兵不血刃豈非王師善之善者耶繼聞留質撫官復以黃洪達往投計緩湖兵力抗川師使救省師老財匱苟且就撫此其爲謀亦狡矣且自貴省行撫之後掠殺良民無數語在公移中亦馬指揮陳知縣輩在賊中備知者也救省徵兵萬五千人鄉民荷戈者亦不下五千人日費運餉節催貴省夾攻使者相望咸稱兵糧未集各將官畏罪會兵圍寨蔡已六日矣萬望明公推卹鄰之仁念同舟之誼蚤賜發兵倍道星馳相爲犄角厲三軍之氣成一鼓之功地方幸甚某幸甚

與王白厓憲副書

昨奉玆翰并軍政條議竊見公籌策戎務卽韓范經畧奚讓乃知小醜不足平矣僕自九月初抵萬漢土官兵俱會遂以濟河坐待貴省兵至夾攻節據把隘官軍報稱貴省差官往寨撫諭初聞甚喜以爲賊果就撫地方寧謐可以復明命矣而逆賊益無畏忌輒肆猖獗此在做省實剥膚之灾若聽諸將翱翔雲萬



石室秘抄 卷五  
卽南岍之民靡有孑遺奉

旨討賊簡書可畏施州衛指揮馬圖乃欲要功以贖  
前罪坐守賊寨何爲哉井木口李指揮盤解百戶康  
學等此乃疆場之責恐有上司陰助詐稱入賊未足  
深罪也黃中狡猾敝省屢行撫處曾以賊姪黃洪達  
送官名爲聽撫實則緩兵非一次也今復襲故智堂  
堂中華赫赫 明命不能致彼反爲所致乎彼果畏  
罪悔禍而縛投款卽詣貴省軍門移文敝省罷兵罪  
人斯得蚤靖疆宇豈非至願古之敵國請降者尚肉  
袒輿觀中賊小寇乃敢羈留職官要挾耶今川兵四  
集刻期進搆伏望蚤賜發兵倍道星馳共爲犄角以  
圖萬全以便會 題無任企竚

又

兩省共事同心協謀何分彼此賊帥黃洪達黃甲黃  
講黃英黃紹龍黃詔等各詣敝省軍營面縛請降獨  
黃金黃河黃洪道黃榜黃屋黃登等尚據寨自固誘  
我官兵退舍而後下山此何異以防求堂堂中華討  
一小醜乃敢旅拒若此且此輩皆亡命之徒數十餘  
年相聚爲亂萬雲奉三縣受其荼毒久矣不乘此時  
大舉圖之後將滋蔓蔓草猶不可除况強賊乎養虎



遺患當事者誰敢執其咎本月十九夜發兵攻入賊寨燒其巢穴已執馘獲醜矣今黃金等議降聽從其便之蜀之楚必須解散黨與處置得宜方爲善後之計息民省費僕念尤勤但劇賊反覆變詐恐兵一退禍不旋踵寨可拆也亦可構也山可下也復可上也大動兵糧而地方不靖小民怨詈俱於兩省不便故不敢苟且了事今賊勢已銷計數日可以收功矣林丞回附復不盡

寄冢宰楊虞坡公書

文煥昨歲賫捧到京荷蒙寵眷延引後學至厚幸矣衷感何極恭仰我翁昔典樞密經畧中外天下以其身爲安危者二十餘年茲者晉秉選衡縉紳交慶一時士負才名抱奇畧者咸奔走之光輔新政坐致太平天下之福也文煥曩事翁于兵曹竄稱駑下蔑有尺寸之能表樹乃猶竊祿數年塵昂光寵則翁實優容之推轂之也今春復辱甄錄徙官楚臬爲前任西蜀罪過叢積致有人言本部憐察查其歷年考薦未遽譴斥不以一人毀譽而槩仕者之平生文煥感激涕零非我翁已墜泥塗矣自今有生之年敢一日忘大惠哉原文煥蒙論實爲龍州破城官軍抗言申揀



觸忤致猜卽離任之後而貝錦之禍作矣嗚呼天地  
明神赫然鑒臨焉可誣也文燉固不足惜而將士功  
未及錄乃並罹慘禍是以賊爲不宜討也人臣奮萬  
死不願一生赴公家之急而全軀保妻子之臣隨而  
媒孽其短蓋自古嘆之嗟嗟已矣寧知戮力爲地方  
討賊致有今日之禍哉疏中所論薛兆乾家貲以數  
萬金賂撫臣噫有是哉有是哉他可知矣昔馬援以  
薏苡蒙殃唐瑾以墻籍起謗文燉無二臣之嫌而遭  
二臣之禍幸際清時豈其穢迹不得已具揭塵蹟干  
冒尊嚴無任皇慄

寄僉憲石董溪書

雙魚之變甚爲執事憂以僕曾守茲土復爲地方危  
之私計門下文武壯猷運籌制勝當必能銷此變矣  
繼得驛書不旬日盡殲千餘倭成功之速收功之全  
大儒作用固如此深爲執事賀爲地方慶也夫倭寇  
乃卒然之變外至之患乃若徑浪之賊蔓延嶺西六  
百餘里盤據阨塞久爲腹心之憂非大調狼兵草薶  
禽獮決不能收蕩平之效僕昔曾建此議督撫以方  
有事東畧暫寢以今頻年用兵民勞甫定恐役不再  
興矣日前之計分兵屯守要害以防出沒而于江道



各置哨船晝夜巡邏庶幾衣裯之戒亦策之次也叅  
將梁海襟沉機藏用昔在恩平曾搗三巢不費斗糧  
計擒積年巨寇今之諸將不及可推誠待之者也僕  
在高涼僅一年奉職無狀深有負于地方而于時事  
頗得見聞一二因執事下問敢私布之摠之皆執事  
熟計之餘也亮之

寄夔守陳獅岡書

去冬過白帝與公泛舟于旋波駭浪之間排灩澦遡  
流上征俯仰懷古至今思之飄飄有凌風之想焉昔  
人言蜀道之難聽之者猶凋朱顏况親所跋踣而又  
窮蜀之險如倒馬坑鷲頂嶺羊腸關鉄鎖橋風洞頂  
雲欄關皆叱馭過之使李白當時見此所謂上青天  
者將復如臨九淵耶入松四面崇山無論春夏玄雲  
合卽脉脉雪下矣古稱黃沙磧裏無春不虛語也日  
惟料丁壯調兵食暇則登臺耀武羌夷重譯稽首環  
牙旗間早休衙得稍尋舊業興發對雪山命酌非復  
案牘勞形如俗吏之所爲也僕始領符時萬里赴邊  
縉紳輒嘖嘖爲僕言道里險阨黠羌之不易馭也頗  
難之乃今稍覺居安忘陋矣執事念我更獨甚諸縉  
紳故特布區區焉



與周將軍書

俾來知足下運籌多筭料敵制勝慮至勤矣彼酋已  
獻甲馬退兵及乞償番命一節邊事被前人創成一  
例致黠酋援以爲詞來移乞償之不前仍起跳梁退  
兵與不退兵同可謂洞識夷情矣至云暫從所請俟  
首惡盡來密約擒斬昔陳湯曾發屯田吏士直抵康  
居斬郅支及名王以下班超在西域以吏士三十六  
人夜奔虜營斬虜使及從士二十餘級餘衆悉燒灰  
此皆古人奇功今挖撒之強不如康居鄯善來而擒  
斬王客衆寡之不敵比班陳在絕域斬名王虜使又  
不同也此亦一奇矣足下度擒斬之後諸羌不至連  
衡報復如康居善鄯震怖帖服否乎縱彼連衡恃吾  
有以待之能以全取勝如西域遣子入待否乎夫兵  
貴動在萬全足下料敵能爲萬全之計則一舉而雪  
三軍之憤爲西鄙懋百年之基功將與班陳等矣第  
恐諸羌動搖以殺降爲名我軍無以制其後法曰知  
已知彼百戰百勝故知而勝筭者上也且虜據險力  
難猝拔則惟出其不意攻其無備或誘而致之或伏  
而擊之冀得一當以挫虜謀不然寧整而待之坐而  
困之貧破其衆勢自乞降則趙充國所以服先零者



足下其熟計之

賀督撫少司馬殷石汀公六十誕辰啓

赤帝執衡適花甲一周之會  
 歲星臨女呈台階八座  
 之祥虎帳融融鴻盤衍衍  
 恭惟閣下望隆山斗器重  
 珪璋九德邁種乎中和  
 衆藝兼綜乎文武詞場獨步  
 鳴金戛玉之珍經笥藏脩  
 武庫青箱之富踐清華而  
 依日月懷獻納而補衮裳  
 咨度楚湘穆清風而播頌  
 保釐吳粵歌棠樹以永懷  
 譽命允升帝心簡在壯猷  
 資乎元老綱紀總之上鄉  
 獨坐臺端佩水蒼而虎視  
 專征闔外秉鈇鉞以鷹揚  
 來蘇大慰乎西人戡定盡  
 殲乎巨孽安民和衆飲策  
 賊助功紀



大常階崇司馬屬五嶺多虞之日厯 九重南顧之  
 憂 恩寵駢蕃綸音申錫登壇耀武獵纓臨戎將校  
 咸授機宜文武悉聽節制瑤池勝會折衝樽俎之間  
 海屋良辰運籌指顧之頃圖太公之韜畧策黃石之  
 陰符虜在日中印懸肘後擒呂嘉于下瀨服罕开于  
 湟中炎海澄清處處同登壽域間間歌舞家家共祝  
 華封范文正經畧涇原出將入相文潞公平章軍國  
 既壽且康某叨陪侍吏恭進華觴莫罄榆楊爰徵昌  
 熾廿四考誇郭令之榮八百齡衍錢鏐之筭

賀劉撫院三川公平白蓮教啓

伏以元老壯猷榮戟遙臨乎東郡上天陰騭歲星光  
 鎮乎西躔茲屬白蓮煽亂遂至潢池弄兵黃巾復見  
 于今時赤眉縱橫乎內地竊大唐之名號擅封拜之  
 威權遠近聞之騷然奸雄乘之響應變又實起于倉卒  
 禍猶惜于支羅仰惟門下德望具瞻文武並用誓師  
 遣將設策出奇登祖逖之舟揮顧榮之扇旬餘日而  
 元惡獻俘黨與解散數千里而百姓晏堵郡邑肅清  
 十圍五攻誠得勝筭一月三捷未足爲奇范文正之  
 經畧涇原裴晉公之出入將相勲業並隆古今躋美  
 者也某猥承重委謬領東征賴法駕鎮臨居重馭輕



喜元戎薄伐安內攘外三軍鼓舞而氣揚醜虜驚聞  
而膽落坐收蕩平之績早馳奏凱之書謹以蕪詞遙  
申賀悃

梅關寄謝李及泉戎院啓

恭惟門下桂嶺乘驄百粵之豺狼盡避湘流擊楫兩  
江之氛祲全銷凡厥攸司率勤乃職文疲遭逢知遇  
敢自棄捐良懷曾參北向之悲輒起子路南遊之嘆  
君平棄世豈其初心令伯陳情實非得已顧迴馭之  
念誠切而去國之懷轉悽天上法垣清光在望人間  
書劔行色漸遙梅嶺桂林舉目有河山之異凌江離  
浦傷心憐風景之殊此日度梅遂睽吳粵何年御李  
恨隔雲泥贖感齊金之投恩銜魏草之報竚千里以  
緘辭披寸心而抒悵莫罄謝虔仰祈清矚

梅關寄謝粵西藩臬諸公啓

伏以南樓偉餞北渚分携別意綢繆感君高誼江流  
迅駛送我行舟絲鷁飛而江山超忽玄猿嘯而景物  
蕭條西方美人雲樹杳渺天涯遊子書劔飄零梅嶺  
桂林舉目有河山之異凌江離浦相逢盡萍水之儔  
星聚七岩雲飛六洞迴馭之情誠亟去國之懷轉悽  
黯然銷魂愴離腸而勞結邈焉寡侶思遡洄而莫從



不室和抄 卷五  
此日度關倍傷室遠何時把袂爰托神交千里緘辭  
寸心莫罄

雷祠祈雨文

雷州府古合州也侯本州人姓陳生六朝梁陳間  
有文在其手曰雷爲本州守有異政歿後爲神以  
侯故改合州爲雷州府我

朝勅封侯王土人極尊信之今子孫繁衍一統志載  
雷郡云雷至冬潛伏地下其形如螭土人掘而食  
之蓋誤認雷郡之雷遂妄爲此說實無是事也夫  
方內且然况方外之事目所不見者可盡信乎盡  
信書不如無書古今傳記非止三豕傳訛虛誕之  
事儒者不道也



惟侯聰明正直血食一方此邦之民無老幼賢愚咸  
祇事侯飲食必祝疾病災患必禱民之敬信也不啻  
著龜而侯之昭答也真如影響歲時有享祝之典  
朝廷有遣使之禮儼遺靈其如在惠我民於無疆某  
奉

天子命來守是邦夙夜在公罔敢怠肆惟茲災沴之  
肆興寔乃政事之有闕謫見于天旱既太甚自七月  
不雨至于今月田疇龜拆禾黍螟生下民其咨我心  
癘暑廼消壬寅之吉恭禱壇壝之南越三日甲辰復  
率僚屬特請侯祠伐鼓鳴鐘齋心稽首俄而玄雲四  
合澍雨隨車民曰天之賜也侯之靈也但土膏方滋  
而泉脉尚竭生意雖回而華實未茂敬將一念之誠  
再瀆明神之佑伏願濯濯著靈驅雷霆而宣號令洋  
洋在上駕雲霧而布星符告箕以蕩氛孽占畢而俾  
滂沱代天弘化溥茲下土

謝雨文

惟天陰隲下民惟風雲雷雨能變化既成萬物惟山  
川能潤百里惟社稷能爲民禦災捍患惟城隍能默  
相我民而保其境內某欽承

上命來守茲土事神治民罔敢怠肆茲農務之方殷



適蘊隆之太甚蝗蝻並作黎庶咸憂揆旱魃降災之  
由寔某等失職所致乃訊壬辰之吉恭詣壇墀之南  
蹠敷衽以陳詞敬齋心而籲告上天降鑒百神著靈  
寧須擊鼓神山奚事暴庭魯甸豐隆軼而玄冥興飛  
廉驅而阿香走鉄騎斯合銀河若傾甲午雨乙未雨  
丙申又雨旣優旣渥旣霑旣足憂深周早喜溢商霖  
坐收如坻如京豈云雨珠雨玉五龍吐氣四野流膏  
普美利于不言歛神功于寂若三農慰望千姓騰歡  
仰荷神休特申圭奠伏願五風十雨時布令以無愆  
千倉萬箱歲屢豐而有慶

祭徐尚寶文

先生器度高朗標格嶙峋游心文苑凝神道真早脩  
奇服爲龍爲光軒然鳳翥作賓虞唐鳴琴花邑治不  
下堂陌有馴雉市無飲羊風清菜餽咏播召棠越登  
司宥邦典是司庶獄明慎八議獨持端詳平恕時論  
所推

帝心簡在晉膺符卿階隣八座縉紳共榮趨瞻禁闥  
出入屏營聲稱籍甚爰卜台衡如何邁閔大命以傾  
嗚呼哀哉予與先生夙契蘭馨好和琴瑟義貫丹青  
庶幾遐年爰有典刑云何奄忽棄我中零俯念同袍



結綬清朝載申姻媾情篤久要論心宴坐携手同招  
尹班高誼陶陶永宵音容如在廣陵寂寥嗚呼哀哉  
臧孫哭孟惠施感莊藥我者逝知我者亡寘懷恐懼  
痛刺中腸推襟在昔把臂敢忘粲粲諸孤既熾而昌  
堂基丕構考心曷傷嗚呼哀哉寒雲慘結靈楯南遷  
朝濟潞渚夕宿江煙巫陽秉筮神返寢筵昔也撫翼  
今茲孤騫薄陳芻束揮袂涕漣

同鄉合祭巡撫塗任齋文

嗚呼明公逝矣鵬集長沙之室星隕諸葛之營三軍  
掩涕里杵休聲嗚呼哀哉於燥我公岷峨降誕紫府  
儲精少負奇犖逸氣縱橫風雅振響一時善鳴題橋  
志壯棄繻妙英名通金籍譽滿

帝京公於是時賈誼馬卿鳴琴花邑化行麥岐政有  
遺愛民有去思公於是時國僑子奇晉陟留銓雅志  
芳潔持衡握鏡流品甄別兩漢左雄豈云孤絕賦政  
于外乃疆乃理爰篤旬宣爰肅綱紀肇敏戎功召公  
是似

天子明堂鑒公賢良錫之節鉞專制閩疆經文緯武  
內安外攘鄰封弗靖福階逆豎環甲登壇陳師整旅  
運籌制勝功成一鼓公於是時方叔召虎軍務頻繁



勞苦宵旰志決身殲英雄長歎方標漢柱遽逐湘魂  
慶者在閭吊者在門嗚呼李廣不侯五穀興涕淚墮  
峴碑泣掩尼袂嗚呼哀哉蘭薰而催玉纈則折物理  
固然天靳懿哲公瑾不延機雲火滅公之位望鳳侶  
高騫公之勲業輝赫凌煙氣化倚伏盈虧逝遷功高  
薄享福隆數違神歸太素各播八挺嗚呼哀哉駕飛  
龍今遊大荒騷赤螭今翼鳳凰飛廉驅兮豐隆將玄  
武馭兮朱雀張遵楚澤兮遡沅湘追屈宋兮參翱翔  
巫陽筮兮招四方猿嘯雨兮巫峽長朝白帝兮侍文  
昌靈要眇兮返故鄉睇凝望兮奠桂漿

祭楊虞坡冢宰文

惟公學貫天人才兼文武實上天篤生以翊輔國家  
丕基君子所恃以培植善類元氣爰自筮仕敷歷中  
外以至位極宰衡前後二十六任自弱冠登第以至  
賜告還家歷官凡四十五年三朝碩望百僚具瞻  
生平宦轍所至民有父母邦有屏翰節鉞所臨胸富  
甲兵門資鎖鑰籌畫樞謨炳機宜而立就藻鑿流品  
裁倖進而獨持中外以公立朝而卜世道之興隆縉  
紳以公秉鈞而占君子之道長忠誠上結乎  
主知故 憑几 嗣服特隆倚毗豐功昭揭乎夷夏



不室和抄 卷五  
雖異域酋長咸識姓名史稱司馬公在中書虜人不  
敢生事開釁韓魏公執政而措天下於磐石之安以  
今諸邊納款稱臣太平全盛公之謀猷石畫德望勛  
庸尤赫然非二公可及矣衆方期爰立之有日而公  
遽爾遘疾某入 賀在京日候起居竊見  
主上眷注遣中官大醫相繼臨問賜以藥物文武僚  
屬徬徨祈望卽兒童走卒咸舉手加額願公壽考且  
寧而公懇疏求解籍符

上命大僕君扶持還家越數月薨逝矣嗚呼殄瘁之  
嗟朝野所共知與不知皆爲流涕所謂生榮死哀者  
耶昔周公勤勞王家而子孫世享茅土奄有龜蒙王  
晉公植槐屬後而其子若孫文正公懿敏公皆身膺  
將相享有榮名公家胤嗣文武忠孝萃于一門文章  
德業以世其家又非晉公父子可及殆與周公比隆  
公固可以含笑于九原矣某昔事公于兵曹繼叅蜀  
藩噴有人言荷公鑒拔知我與生我等聞公之訃坐  
局官守不能如徐孺子炙雞絮酒匍匐往吊而萬里  
緘辭無能報塞臨風灑淚聊以哭吾私云

祭都督李西垣文

先生資兼忠勇胸抱韜鈴奮跡淮揚單騎當倭酋茂



著鷹揚之烈總戎閩越樓船下潮海大收鶴唳之勳  
仗鉞平蠻登壇誓衆身先將士府江之氛祲全銷深  
入瘴鄉東粵之機搶盡掃大業高標乎銅柱元功昭  
揭乎太常 寵命薦嘉宜分茅之有日璽書褒美爰  
世及之賞延威震華夷身膺鎖鑰云何天奪景畧之  
速星隕諸葛之管志決身殲英雄長歎嗚呼馬革裹  
屍固豪傑所以輕歿生先生豈糾纏世網嬰情去留  
歔歔兒女子之前者哉曩予與先生同事始安相與  
談邊務先生輒長嘯激烈有鳴劍伊吾封狼居胥之  
意固氣蓋一世之雄也自予得 請東歸先生餞送

灘江之上杯拳留連至斗落參橫而罷既乃別去尚  
期續後會之歡而今已矣噫忝言共憶昔與先生語  
陶元亮兒子賢愚事先生出示令伯子所爲舉子文  
章英邁之氣卜其他日聳壑昂霄當爲不凡之器  
聖天子側席網羅思得文武材以効世用所謂君家  
千里駒必克負荷以光前烈先生固可長笑于九原  
矣

祭陳津南大叅文

予自爲弟子員已知先生積學富文聲稱獨擅乎詞  
場迨甲辰計偕通籍朝著分曹委質與先生並執戟



爲郎出則聯轡入則班行論心旅邸之榻携手燕市  
之月先生襟度朗豁吐論芬芳青雲雅契風雨連床  
尹班交談永夕蕭朱結綬清朝予蓋兄事先生先生  
亦莫逆視予相與心期不忘也及先生以京朝官出  
守分符乘傳建隼荆陽化行江漢咏播甘棠敷歷渤  
海三晉之要區皆屬錢穀兵戎之重寄劈畫久勞于  
盤錯勲庸茂著乎旂常時予承乏粵蜀蹤跡殊方蓋  
常仰高風而嚮往欽令聞之遠揚矣時論共期先生  
柱石清朝爲國家樹太平鴻業而先生遽返初服稅  
架柴素攬結義江之勝嘯傲烏石之傍留連光景托

興詩觴予亦得請南歸日隨先生杖屨徜徉方欲脩  
唐會昌宋元豐故事爲洛社之會徵福古人旣壽且  
康詎意浮雲泡影飄忽靡常先生溘然仙逝使我灑  
淚而涕浪也嘗讀先生蓬窓日錄具悉弘博之才經  
世之畧顧朝廷所以用先生者未盡而先生尚未獲  
大究厥施每私嘆之天將屬意胤嗣之彌昌也耶予  
義篤久要情締姻好薄陳椒漿一奠若聞笑語洋洋

祭陳海洲大叅文

先生早歲與予同遊郡庠文譽已擅乎藝場部使者  
錫山王公校文以先生冠多士是歲遂擢秀于鄉予



叨先後策名通籍與先生並執戟爲郎先生才名籍籍粉署特立班行

聖天子簡用二千石思與共理先生首擢乎古杭蓋東南要會財賦之名疆也先生才負經濟建隼錢塘造奸人王直徐海勾引倭夷造孽構殃先生晝討軍實夜籌餉糧佐督府用間設奇卒定巨勦三年政通人和晉贛江兵備尋徙藩叅經文緯武德威遠揚帽山之積宥遁跡吉安之叛兵歛藏勲庸茂著而不免忌者之中傷先生遂拂衣投劾稅架柴素予亦陳乞而歸與先生載締姻好陸若潘楊每遇芳晨麗景輒

御詩酒徜徉相期百齡鶴筭結社烏石之陽以老歲華以樂壽康先生倏爾長逝使予涕淚之浪浪也嗚呼已焉哉海中洲兮仙翁蘿爲帶兮蕙裳駕神龍兮上征與白雲兮飛揚儼儀容兮陟降在左右兮洋洋陳笙竽兮鼓瑟湛清醕兮芬芳若有聞兮歎息神之格兮來嘗



林令來嘗

刻至卒令續悲甚青輜令太苦苦亦聞令嘆息輒之  
上公與白雲令派賦對容令刻刻五式本令半半  
河心焉共試中階令山餘蕪為帶令蕙棠驚輒請令  
達心與書與去主外爾其波對于前斯之斯斯少知  
除請百餘半賦賦百箇歸筆餘抗為不之則以去氣

南京戶部員外郎渠清魏公墓誌銘

公諱濠字方舟別號渠清福清人世居東區山魯大  
父宗遷沙塢大父俊父椿號滄浪用公貴贈錦衣衛  
經歷嫡母范氏生母陳氏俱贈孺人兄弟六人長廷  
麟次帶漆灞次大濟應貢授徽府教授公最少性坦  
夷凝重為滄浪公所鍾愛年十二挈居會城習舉子  
業弱冠補邑庠弟子員文名日起督學金一所公群  
閩士之優者講習於養正書院公哀然高第也士月  
給廩餼公輒辭不受雅為金器重為文根極理致渾  
厚近古如其人以尚書領嘉靖甲午鄉薦丙舉進士



不第戊戌授浙江湖州府武康學諭武康故下邑儒  
効濶疎公至嚴科條端表樹一遵蘇湖遺矩士日烝  
烝丕變矣督學張濛溪公廉知喜曰是固善作人者  
使師儒官皆若人菁莪之化豈遠哉郡守張公鐸雅  
敬慕公延脩郡志癸卯典河南文衡時稱得人尋遷  
台之太平令爲政務存節愛不求赫赫名邑故多浮  
糧鹹田下下民苦征徭歲多流徙者公按公田得侵  
沒六千餘畝悉以補豁賦政始平民稍稍復業矣巡  
撫朱秋崖公征倭至海上檄下郡邑亟徵援卒公具  
舟師備糗糧倉卒立辦大爲秋崖公稱賞其遇事勇  
爲類此乃若鬻寺租以闢豐舍處學田以調貧士脩  
永通金清二閘築六眼九眼海塘善狀鑿鑿可紀洎  
邑八年興利剔蠹當路交獎譽之漢重安靜之吏悃  
悃無華月計不足歲計有餘公非其人耶邑人刑部  
尚書趙方崖公爲公去思碑云實心力行不求人知  
蓋實錄也辛亥遷錦衣經歷去之日民攀轅載道有  
不忍舍泣下者今郡志載之名宦云錦衣職典禁兵  
故多豪校暴橫公繩以法罔敢肆者卽貴顯如執金  
吾堂大僚也見公必歛容敬焉公以此聲稱籍甚薦  
紳咸推轂之秩滿遷南京戶部員外郎監督鳳陽倉



儲以廉平稱歲丁巳公年六十有六矣嘆曰吾能任  
衣冠卽抗志以就功名晚而有成歷宦侵尋殆二十  
年怱怱如瞬息茲髮種種矣何自苦爲也吾其歸乎  
乃力請乞骸奉

旨致仕築室屏山之陽杜門息交卽里人不知有大  
夫廬也耽嗜經籍老且彌篤所著有四書訂正小講  
垂響集藏於家天性孝友視兄弟之子猶子群族之  
人自公貴無至失所者厥子若姪俱恂恂謹飭無違  
禮者世以此多焉范蠡有言旣以施於國吾欲用之  
家以公涖官處家耳目所睹記章章如是所謂篤行

君子非耶

今上改元有

詔晉公階奉議大夫又三年己巳以疾終于正寢云  
云予與公同年同宗謝不敏弗獲乃爲之銘銘曰

漢傳循良 周師孝友 大夫行誼 兼此而有

邑咏甘棠 門垂五柳 杖屨優游 尚書左右

有鵬夜鳴 筮逢其咎 爰有遺文 以托不朽

北臺峩峩 封丘孔阜 光闕重泉 慶衍厥後

我勒銘詞 昭垂永久

明通奉大夫廣西左布政使心泉林公偕醜封



孺人龔氏墓誌銘

自古經世之士必有宏博之才斯能理盤錯而掌諸  
艱必有剛大之氣斯能排衆議而正國是必有權變  
之智斯能定傾危而濟大事所謂邦之司直國之良  
翰若吾年友方伯心泉林公非其人歟公諱懋舉字  
直卿其先宋樞密溥之後傳數世至鈍永樂間以鄉  
薦爲典國教諭生四子三登甲科時有閩中三鳳之  
稱以仲子泮貴贈戶部尚書季子瀛郡庠生卽公曾  
祖父也祖文鳳邑庠生父旻以公貴贈南京工科給  
事中母鄧氏贈孺人公幼穎異七歲能文十歲就試  
有司卽爲郡長歐陽石江公所稱賞十四補弟子員  
公其時業已馳聲士林間矣嘉靖甲午領鄉薦甲辰  
登進士授鳳陽府推官讞獄明允不深文苛峻稽查  
江北諸郡邑事發奸摘伏人不敢欺賢聲籍甚選擢  
留都諫垣公風采凝重以經濟自任嘉靖二十九年  
達虜深入震驚畿輔公條陳邊務五事論劾邊臣建  
議欲順虜情以牛羊易米豆反覆敷陳所不可者六  
務存國家大體及條陳江防事宜清查錢糧蠹弊薦  
舉邊才糾劾不職諸臣多所建白皆爲  
世廟嘉納秩滿奏最適蘇州守缺難其人吏部卽以



公名上請報可蘇州財賦甲江南多逋負俗尚矜艷  
公至禁奢靡抑豪右省煩縉時徵輸一切與民休養  
會倭寇突犯松江掠大倉崇明殺長吏時命將出師  
羽檄交馳凡徵發供億取辦倉卒公皆以身任之繕  
城郭峙糗糧嚴斥堠民恃以無恐賊窟于金山柘林  
之境窺全吳進薄郡城大肆虔劉禍甚憐公登壇鼓  
衆誓滅此朝食與賊連戰却之復遣兵襲擊覆之于  
鶯湖有點酋嘯聚猛鷲賈勇可以當百自杭嚴西掠  
宣歙長驅至毘陵所向披靡公躬擐甲督軍至郡西  
橫塘士氣百倍一鼓而殲之捷聞有白金文綺之賜

當兵荒相繼饑饉薦仍縣官索租且暮追呼公曰民  
力竭矣請于部使者奏蠲常賦十之七八民困始蘇  
吳人倚公爲長城愛公如父母相與建祠尸祝祀焉  
屬東廣寇攘 當宁知公有戡定才遷廣東巡海副  
使嘉靖三十六年大征扶溪大羅山諸峒公司紀功  
多所指蹤獎率三軍直搗窠穴草薶平之踰明年倭  
寇自漳泉入揭陽破蓬州所流毒海豐饒平諸邑殺  
守將攻關堡焚廬舍惠潮之間騷然矣公星馳至潮  
州會文武僚屬調集漢達狼土兵勇用間設竒破之  
於黃岡鎮賊宵遁官軍乘勝搗虛復大破之俘馘殆



不空和抄 卷五  
盡粵人離去湯火莫之枕席公之功也語在粵外志  
又明年遷山東叅政東苑諸郡歲饑民轉徙流離公  
行縣以便宜發廩賑卹所全活萬餘人

景藩就邸扈從中貴人怙勢恣睢所過繹騷自公所  
部綜理有方中貴人聞公名亦自歛輯尋遷廣東按  
察使風裁峻整法紀嚴明再遷本省右轄入賀

萬壽事竣得疾抵家晉廣西左轄未任適廣西藩司  
有劫庫之變黎叅政遇害公聞力疾就道竟以履任  
愆限爲言者指摘解組歸以前疾卒于隆慶戊辰年  
十二月十七日享年五十有九予與公同舉于鄉同

登進士在京師同邸舍公嘗語予曰吾性外見不自  
晦迹懼直木防伐君恬退于物無猜處世而能長久  
者惟君乎今與公歷宦三十餘年閱世多矣公茂建  
殊勛永有令譽可謂能用所長矣予惟守拙以終其  
身思公前言如持左券八聰明過人博綜經典爲詩  
文力去陳言沉郁麗則直追古人嘗與子論古詩文  
曰六經尚矣其次則秦漢魏晉盛唐諸名家皆絕代  
振響嚴滄浪論學詩如學禪須從最上乘文亦如之  
噫此以知公精思玄解入門之正自得之深矣所著  
有奏議詩文十卷世共珍之配龔氏性行貞淑勤織



經佐公力學成名與公齊德封孺人先公卒年五十  
有二云  
云銘曰

鳳之雛 五色章 出丹穴 升高崗 儀聖世

鳴朝陽 一鳴朝有道 二鳴四海康 鳳高舉

孔悲傷 卽今鳳池上 猶有鳳來翔

封太宜人洪母黃氏行狀

洪爲閩中閩姓自御史大夫澹成公而下以禮經冠  
禮闈省闈奕世顯融稱貴盛矣非獨男教蓋亦有女  
教焉焮在里閭中稔聞黃太宜人懿行得而論述焉  
太宜人諱蓉黃之先洪武中有諱楠者以人材起家

爲澄邁令楠生曷負才名與高漫士林博陵諸先輩  
號爲閩中十才子太宜人之高大父也父諱海隱德  
弗耀太宜人生而貞慧稍長知孝敬通孝經列女傳  
論語小說稗官諸書歸大夫鹿溪公偕嫡鄭太宜人  
相禮重若姊妹然中饋惟謹澹成公立

朝掌都察院事以直道大節厲一時故所遺後清白  
鹿溪公爲嫡孫領弘治辛酉鄉薦就祿仕授壽州學  
正庚午歲太宜人舉憲副君鄭太宜人抱弄之愛若  
已出愈益禮重太宜人遂以攝家政勤織衽潔蘋藻  
共賓宴和宗黨御減獲總總咸有條理門以內井如



也天性慈仁見人愁苦若疾疢在身其以空乏稱貸  
卽舍簪珥推衣物不少愆也鹿溪公自壽州改無爲  
州尋徙郟城新寧二邑令太宜人皆從之官甲申歲  
舉廷評君一日太宜人言于鹿溪公曰大兒已總角  
異日者必見其崢嶸何不及時歸而躬課督之母寧  
久而沾沾微祿爾也鹿溪公聽其言遂解官歸無何  
鹿溪公卽世蒞仕二十餘年清脩雅操筭無長物當  
其時太宜人佐內治如室人交徧亦不能成大夫之  
高故世謂太宜人兩難之也太宜人則惟日夜以先  
人居常念鬱鬱不得一第勗二伯仲督令勤學嘉靖  
甲午憲副君領鄉薦戊戌舉進士丙午廷評君復領  
省元太宜人且喜且泣拊二子曰而父困於一令賫  
志以沒而兄弟相繼成名曷思光昭乃祖乃父遺烈  
勉之哉二君服官伯歷南刑戶二部郎署湖廣少叅  
山東浙江憲副仲歷全椒令南大理評事皆奉母訓  
廉靖勤恪縉紳雅所推重先是太宜人以憲副君秩  
滿疏請馳封膺冠帔之榮嘉靖己未太宜人是歲六  
十有九矣憲副君在東省念母春秋高有離憂乃以  
辭官請命太宜人太宜人曰吾志也遂懇疏乞身得  
俞旨歸廷評君亦以隆慶壬申投牒伯仲承歡膝下



石室利林 卷五  
歲時稱觴絲衣踰躔里閭榮之太宜人喜曰吾兒可謂不負祖父遺烈矣自伯仲歸太宜人晚歲耳目聰明心志恬愉安享遐福殆二十年萬曆丁丑忽遘疾仙逝時六月二十四日也距生弘治辛亥九月初一日享年八十有七云憲副以焮辱同年不鄙蕪陋稽顙告曰某葬母有日矣痛惟懿行緒言典刑具在匪直梧椽留澤而已荒迷啣哀粗述大畧敢煩執事序次之將藉手乞銘于名公歿且不朽焮通家猶子輒不揣爲刪定叙述以復二君不敢以蕪陋辭謹狀

先妣胡太淑人行狀

母太淑人胡姓諱玉系出宋胡文定公季子五峯先生裔世業儒閑習姆訓貞靜端肅歸我先考贈戶部主事木庵府君偕嫡封太安人陳母中饋惟謹先考爲人倜儻豁達好義樂施不繼嗇務積母佐以勤儉先考性喜客客至輒款留母爲治具必精必腆有雜珮之遺天性慈仁見人窮窘愁苦若疾疚在身周人之急不問家之贏乏卽推食與衣無少愆也此母與先考一也先考通堪輿爲王父卜葬每日吾少子當貴頗屬意不肖爲擇嚴師母艱辛課督防其游佚夜則篝燈相對理紡助勤飲食服用卽一楮一墨必戒



以惜費至隆師之禮購書之貲皆母紡績累絲寸積所易者文煥所與游士皆知名益者至則講論疑義相詰難或至夜分母爲設果殽悉出親操文煥領嘉靖甲午鄉薦得病危篤絕而復蘇醫藥罔效母忍涕忘寢食徬徨祈望禮北辰以徼神佑忽一夕昏迷中恍有童子若先考所脩建復初庵老佛傍侍童寒山者以藥強使飲覺而吐恣然汗出霍然病已此非吾母一念齋精明神佑之耶文煥屢不偶春官家益困乏先考施舍不倦母治絲枲拮据經營俾文煥得專精舉業至甲辰登進士是歲先考卽世不孝奔喪南還服闋携母之京歷官戶兵二部得以微祿就養丙辰陞廣東雷州府知府迎母至官舍每誠不肖曰吾兒爲民父母當子愛百姓箠楚之聲吾不忍聞文煥是以讞獄詳慎治雷五年未嘗任情輕入人罪母之訓也身爲大夫之母衣惟絺素曰吾自適體甚安也食不二葢曰吾自適口甚飽也戒子孫毋忘貧賤時過分損福見合案上飯器有餽餘遺粒必掇食之曰天之美祿也其愛惜物類如此陳母所出三兄長舒城尉文煥次文燦文炳事吾母惟謹三兄所舉諸姪若孫吾母愛若已出雍雍如也御僕婢終身不見有



疾言怒色視義子子愛之無異諸孫也文煇陞四川副使歷叅政總憲湖廣以楚蜀道艱留母在家以婦田孺人侍再調廣東叅政陞總憲廣西時母年八十三耄矣卽欲乞身侍母母曰吾飲食精力尚康幸無恙且婦諸孫在汝第行無以我故自茲往從汝志矣不肖遲回累旬別去抵任明年得家書言母龍鍾狀腸刺刺如割遂陳情懇疏蒙

恩俞允解印綬還矣到家拜母不知爲兒也扶持者累日忽問曰吾兒回耶一日不肖出外反見母母猶道往時語問曰食飯未讀書勤苦強加餐也終日嬉嬉若小兒狀無思慮無煩惱無罣碍亦不知時之寒暑早暮也聞之脩養家云人生始而嬰孩旣老如木歸根復若嬰孩狀一日數盡無病而逝若仙蛻者此惟心地慈悲有善果緣者得之五福所謂考終命是也丁丑歲二月初九日母尚晡食無恙忽三更微痰飲薑湯就枕天明逝矣嗚呼痛何忍言親朋視歛者見母顏色溫潤勝如生前咸異之脩養家之言不誣也自不孝歸家奉菽水厯厯十四月未盡板輿之情可勝風木之恨嘗讀裴我詩父母生我欲報罔極詩詞所稱言鞠子劬勞耳始予娶鄭孺人舉一女方



石室私抄 卷五  
嗚嗚而泣而鄭亡繼娶高氏舉二女而高亡復娶徐氏舉三男一女而徐亡不孝三喪妻藐爾諸孤無母何恃皆吾母拊畜之提携之冬不得母溫夏不得母清劬勞者累歲奚止蓼莪所稱今次第成立以婚以娶使非祖母何以有今日吾母之恩愈深矣不孝之罪愈重矣悠悠蒼天曷其有極嗚呼痛何忍言距生弘治壬子年十二月初十日享年八十有六男一卽文煥女二云云孫男五長啓畿庠生娶高教授孝忠女次啓雷庠生娶陳節推躍潛女次啓疆庠生娶林舉人皆春女次啓輔聘陳太叅柯女次啓藩聘陳大叅全之女孫女四云云曾孫男九賢訓賢誥賢誨賢論賢訥賢讚賢詔賢諮賢諤曾孫女五俱尚幼卜以是歲十月十三日葬于金鼎山之原背癸面丁追憶母平生行實一二願徼惠于大人長者名言光賁泉壤云

石室私抄卷之五終



大人其言各言其責泉謝云

母平生云寶一二願熾惠于

吳歲十月十三日荃平金鼎山之風許癸酉丁亥

備贊賄贊齋贊信贊齋贊齋曾終女五財尚也

參全之艾終女四云云曾終思也贊信贊齋贊齋

### 跋

古之君子論譏其先祖之有德業  
文章而明著之後世斯仁孝之所  
為也故有善而不知謂之不明知  
而不傳謂之不仁君子恥之訥嘗  
讀此而有感焉自惟樗散無似賴



先澤未斬得列仕籍邇者還里伯  
兄訓語訥曰吾祖歷官總憲乞養  
家居為廬道山下扁其門曰石室  
清隱二十年屏跡公庭讀書於此  
其所撰著刻成卷帙名石室私抄  
先輩頗重之吾兄弟不能自樹清  
隱之室已屬他姓而私抄之集亦  
復半逸再重梓之是誰責也訥唯  
唯竊惟方今闡揚先烈在賢子孫  
訥等不肖不能光昭先世罪矣又  
何敢沒大父之精神使不永其傳  
哉夫著書而可傳於後者必有絕



代之才論世而如見其人者必具  
千古之眼先大父詩文記銘時時  
有作而於讀史尤致意焉其論隲  
往事或足以上掩前人下壽來世  
詎不敢知然而可窺其精神之所  
存也乃其策名監勲表見當世聞

且見者皆能言之如鎮蜀西羌則  
有平龍州討支羅之績守粵嶺西  
則有除山賊勦海寇之功松藩政  
記征蠻議大征議海運議安攘議  
俱班班可攻詎等其不為虛美以  
張大前人嗣矣至若闡中往苦夫



甲大日之害當之者輒折家破產  
大父貽書譚中丞即日除筆至今  
賴之而不知其為誰之賜嗚呼士  
大夫出則竭力盡能立功於國居  
則興利替害為德於鄉視夫私  
自便而無益於時之緩急者果何  
如哉因命梓人更新是刻使讀之  
者知大父之德業文章可傳若此  
非若雕蟲之士徒以繁悅為文已  
也

辛未臘月不肖孫賢訥謹識

